



Borgmester Hermann Berthelsen-ip Hudson Resources-ip tusarniaalluni kommunimi angalanerani tikilluaqqusilluni oqalugiaataa.

Nuannaarutigaa tikilluaqqussallugit Inuussutissarsionermut, Suliffeqarnermut, Niuernermut Nunallu Allanut Naalakkersuisoq Vittus Qujaukitsoq, Pinngortitamut, Avatangiisinut Inatsisinullu Atuutsitsinermut Naalakkersuisoq Mala Høy Kuku atorfilittaallu.

Hudson Resource-ip pisortai tikilluaqquakka qujaffigalugillu Kangaamiunut, Maniitsumut, Itillimut, Kangerlussuarmut, Sarfannguanut aammalu Sisimiunut uani tusarniaanermi innuttaasunik ataatsimiisitsinernut angalaqataanissatsinnut periarfississimammattigut.

Minnerunngitsumik tikilluaqquakka innuttaasut Kangerlussuarmi aatsitassamik pīianissamik suliniummut tusarnaariartut. Pingaarutilerujussuuvoq innuttaasut kommunilu tusarniaanermut atatillugu isornarsorisatik pillugit oqaaseqartarnissaat kiisalu immikkut ilisimasalinnut maani peqataasunut apeqqarissaarnissaminnut periarfissartik atorluarlugu. Kommunip pingaarteqaa innuttaasut peqataatissalugit apequtitut ulluinnarni inuunermi sunniuteqarsinnaasunut kiisalu avatangiisiminnut sunniuteqarsinnasunut.

Qeqqata Kommuniata ineriartortitsinermi aatsitassarsiorneq pingaartippaa taammaattumillu qilanaarutigalugu kommunimi aatsitassamik pīiaasoqalernissaa. Ulluni makkunanerpiaq kommunu ukiuni sisamani atuuttussamik Pilersaarusiinermi periussissat pillugit innuttaasunut tusarniaavoq tassanilu kommunip pingaartippai aatsitassarsiorfiit mikinerusutut oqaatigineqarsinnaasut taakkuami aallartinniarni ajornannginnerusutut immata atuilluutuunissamillu eqqarsaammut naleqqunnerullutik. Aatsitassarsiornermik ingerlatallit mikinerusut amerlasuullu ineriartortitsinermi siumut alloriarnermik pilersitsisinnaapput. Kommunalbestyrelsimi ilaasortat tamarmiusut tamanna 100 %-imik tapersersorpaat.

Hudson Resources nunatsinni aatsitassarsiornermik ingerlataqartuni siviunerpaamik ingerlataqarsimasut ilagaat. Siulliullugu diamantisorneq ingerlassimagaluarpaat kiisalu kingusinnerusukkut aatsitassamik qaqutigoortunik misissuinerit Sarfartup nunataata ilaani ingerlassimallugit. Kisiannili nunarsuarmi pineqartunut taakkununga akigitinneqartut apparmata misissuinerillu akilersinnajunnaartutut nalilernerqarmata Anorthosit-imik pīianissamut pilersaarut ingerlatilersimallugu suliniullu taanna neriuunaateqarluartutut oqaatigisariaqarpoq.

Kommunalbestyrelsi sinnerlugu Hudson Resources nersualaarusuppara qutsavigalugulu pimoorussillutik nakkaannaratillu Kangerlussuarmi aatsitassarsiorneq ingerlassimammassuk. Neriutigaara maanga

attuumaasuteqarnertik ingerlatsinertillu ingerlatiinnarumaaraat qilanaaraaralu Hudson Resource-sip allaffia Qeqqata Kommunianiittoq pulaarsinnaumaarlugu.

Kommunip iluarusuutigeqaa Hudson Resources sukkasuumik tunaartaqarlualunilu Anorthosit-imik piaanissaminut piareersarmat tamannarpiarlu tusarniaaneq maani ingerlanneqarpoq siunissamilu sulifissanik pilersitsissaaq kommunimut landskarsimullu akileraarutinik isertitsiviusinnaalissalluni.

Kommunillu neriutigaa Naalakkersuisut allallu suliamut attuumassuteqartut sukkasuumik patajaatsumillu aamma sulisinnaajumaartut Hudson Resources-imiit piaanissamut qinnuteqaat suliarineqalerpat.

Neriutigaara, maani ataatsimiinnermi peqataasut tamarmik pissarsilluarumaartut.